

Uannga: Piitannguaq [<mailto:polt@greennet.gl>]

Nassiunneqartog: 7. marts 2012 23:01

Uunga: Aatsitassanut ikummatissanullu pisortaqarfimmut allagaq tamanut ammasoq
Sammisaq: London Mining Greenland A/S-ip misissuinissamik akuersissutaa 2009/16
(isua) 2012-mi suliniutissaminut akuerineqarnissaminik qinnuteqaataanut
tunngatillugu tamanut tusarniaaneq

**Nuup kangerluata Ikinngutai 22. februar Nuummi timersortarfissuup
cafeteriaani ataatsimiipput.**

Ataatsimiinnerup siunertaraa kattuffiup Nuup Kangerluata Ikinngutai/Nuuk
Fjords Venner pilersinneqarnissaa aammalu London Mining-ip Alcoallu
pilersaarutaannut illuatungiliunnissaq.

Ataatsimiinnermut inuit 95-it takkupput. Ataatsimiinnerullu
pilersaarusionerqarnera imaappoq:

Nuup Kangerluata Ikinngutaata Piitannguaq Tittussennip tikilluaqqusinera
aamma naatsumik suup siunertaaneramik saqqummiussineq.

Qaaqqusat Nuup Kangerluanut tunngasunik paasissutissiinerat, ukua
saqqummiisoralugit:

Tungutaq Larsen aamma Ole Lynge sumiiffik London Miningip
saviminissaajaaffissatut aammalu tatsit Alcoap atussallugit
pilersaaruteqarfigisai tamaasa assitalersorlugit saqqummiuppaat.
Saqqummiussineq taanna 1 tiimi tikillugu sivilisuseqarpoq, nalunaaqutaq
19:10-mit 20:10-mut ingerlalluni. Tungutaq Larsen aamma Ole Lyngep
oqaluttuarivaat Ujarassuarnit Isukasianut aqqutaa tamarmi
inussuppassuaqartog, siulitta tamaaniittarsimanerannik
ersiutissarpassuaqarluni, ilivitoqaqartog allaallumi ilaatigut 1900-kkut
aallartilaarneranneersut kuisimasut ilerri Nuummut
apunnegarsinnaajunnaarlutik tamaani ilineqaannartariaqalernikut
takussaallutik. Nutaanerusunik nutaanngitsunillu tupeqarfikoqarpoq
inussoqarlunilu, Isukasianit saviminissaajaavissamiillu aqquserniassamit
aseruinnarneqartussamik, tamannalu aamma Isukasiani Qussummilu
taamaappoq.

Tamatuma kingorna aalisartog Malaaraq Bourup Nielsen Nuup Kangerluani
aalisartarfiit pillugit saqqummiivoq, assitalerlugillu aamma
uppernarsarneqarput, saqqummiineq halvtiimi sinnerlugu ingerlavoq.
Malaaraq Nielsen oqaluttuarpoq Qussuk eqqaalu tamarmi, Ujarassusuit
aammalu Ilulialik ataatsimut eqaloqarfissuusut aammalu aalisakkat
qaleruallillu nunatsinni pingaarutilittut ilisimaneqartut tamarmik Nuup
Kangerluani uumasuusut. Aamma oqaluttuarpoq nammineq saviminernit
arrortikkuminaatsunik London Mining-imit aniatitsilernissaq umiarsuillu
angisoorsuit illumut silammullu ukiorpassuarni ingerlaartualertussat
ersissutigisorujussuullugit. Minnerunngitsumik ersissutiginerarpaa
mingutitsineq pilertussaq, pujoralaat, aqquserngit, kuuit aammalu
nunakkut. Malaaraq isumaqarpoq London Mining Greenland A/S sanaartorluni
saviminissaajaallunilu aallartissappat Nuup Kangerlua ukiorpassuarni
eqqornerlunneqassaaisoq. Aamma oqaluttuaraa aalisagarpassuaqartog sulilu
ukiorpassuit ajuusaarutigiginagu akilersinnaasumik aalisartoqarsinnaasoq,
aammalu piniariartarfiit aalisartunut piniartunullu pingaaruteqaqisut.

Anthon (Aantuunguaq) Falksen Nuup Kangerluani Qoornumi inuusimasog
Isukasia eqqaalu pillugit ima oqaluttuarpoq:

Piffiit Londond Miningip atorusutai tamarmik siuaasatsinnit
ukiorpassuarni atorineqartuartarsimapput uagullu aamma sulil
ukiorpassuarni aalisarfigalugit piniarfigalugillu
atortuarsinnaagaluarpagut. Naak nunap assingani

allattorneqarsimangikkaluartut piffiit tamarmik ateqarput. Oqaluttuaraa angakkorsuaq nuummiu ilisimaneqartoq kingulleq Ilulialimmi iliveqartoq. Isumaa malillugu nuna tamanna ataqqinnissuseqanngitsumik pilersaarufigineqarpoq. Tupigusuutigisimanerarpaalu Aningannaami London Mining nunaqarfeeraliorsimamat misissueqqaarnissamat atornegartussamik, namminerlu pilersaarutit tamakku ilisimasimanginnerarlugit nammineq isiminik takutinnagit. Aantuunnguup London Miningip piffinni pissusilersuutai assut pakatsissutigisimavai.

Tamatuma kingorna Josef Jakobesennip oqaluttuarai aatsitassarsiorfimmut Seqi Olivin-imut tunngasut - ingerlanerata nalaani sulisimanini aammalu tamatuma kinguneranik nappaatit pigilersimasani oqaluttuaralugit. Isukasiani assinganik pisoqarnissaa Josefip oqariartuutigaa ammalu oqarluni pujoralak ajornartorsiutitsisimaqisoq, eqaloqarfik aserorneqarsimasoq umiarsuillu aatsitassamik Seqi Olivinimut aallertut assut ajornartorsiortarsimasut. Josefip oqaatigaa umiarsuarsuit sikulimmi ilulialimmilu angalajumangittaqisut uniinnartarlutillu. Taamaammallu ukiuunerani kangerlummi sikoqaraangat merserusuttaqisut. Tamatuma Nuummi aamma pinissaa ilimagaa - kangerlummummi sikulimmut pulasinnaanaviangillat.

Mikkel Myrup Avataq-mit oqaluttuarai ajornartorsiutit VVM/VSB-mut tunngasut Aatsitassanillu Pisortaqarfiup taakkuninnga aqutsineri. VVM-imut piumasagaatit maani assut inikipput, Canadamut Australiamut Alaskamullu sanilliullugu. Tamatuma takutiinnarpaa Aatsitassanut Pisortaqarfik aatsitassarsiornermut tunngasunik qanoq ilisimasakitsiginersoq.

N.A.P.P. (Nuummi Aalisartut Piniartullu Peqatigiiffiat) allakamik Naalakkersuisit siulittaasuannut Kuupik Kleistimut tunniunneqarsimasumik nassarlutik takkupput. Allagaq London Mining-ip pilersaarutaanik akerliunermik oqariartuuteqarpoq, Nuullu Kangerluani aalisartarfiit piniartarfiillu ataqeqqullugit. Allakkap assilinera Nuup Kangerluata Ikinngutaasa pigaat.

Naggataatigut innuttaasut oqaaseqarsinnaatinneqarput, imalu oqaaseqartoqarpoq:

"Pissutsit tamakku London Miningip pilersaarutaanut tunngasut ilisimasimangikkaluarpagut - taama annertutigisumik sanaartotoqarnissaa tupannaqaaq."

"Tusarlugu tupannaqaaq qanoq annikitsigisunik Namminersorlutik Oqartussat nunanut allanut sanilliullugu VVM/VSB-mut tunngasunik piumasagaateqartarnersut."

"Tusarnikuuarput Kina nunarput pillugu ima oqarnikuusoq:

Sunaana ajornartorsiut - Kinami inuit millionilikkaat akerliugaluartut nuutsinnikuuagut, inuit 57.000-it sunaana ajornartorsiutitut isigigaat, Maniitsorluunniit matuinnarlugu innuttaasut nuutsinneqarsinnaangillat."

"Kangerlupput aserorneqartikkusunngilarput - siulitsinninguna kingornussarput meeqqatsinnut ernuttatsinnullu ingerlateqqitassarput, aalisagai, timmiai uumasuilu tamaasa aatsitassarsiornermit sunnigaangitsuutillugit."

Nuup Kangerluata Ikinngutaisa matumuuna London Miningip VVM/VSB suli saqqummiunnagit Qussummiit Iluliallip tasersuata tungaanut sanaartorlutik aallartinnissaannut akerliunertik nalunaarutigaat.

Piumasaraarput matuma tusarniaanermut ilanngunneqarnissaa, tamatumalu akuerineqarneranut uppernarsaammik perusulluta. Ikinngutinnersumik inuulluaqqusilluta:

Piitannuaq Tittussen

p.v.a.

Nuuk Kangerluata Ikinngutaanit suleqatigiisitat